

Mapabaxutoje San Judas toyaquina Dioso pejumecovënëtsivijavabelia

Pacuenia Judas mapabaxutoje toyaquina Dioso pejumecovënëtsivijavabelia yabara pelivaisi

¹ Xanë Judasnë, Jesucristo pijajivitonënë, Santiago pejuyapijinënë. Pacatoyaquinatsi mapabaxutoje paxamë Dioso papecaasivaivi. Dioso pacajunata papijajivinexamë. Paxamë asaëya Dioso pajumecovënë-tavanapame Jesucristo papecajavaponaponaexae. ² Pacatovajëtatsi Diosojavabelia bitso papecaitaxutotsoniataenexa. Pacatovajëtatsinua Diosojavabelia itsamonae ata Dioso pitabarata barajamatabëcuenexane-panaeya panejinavanapaenexa. Pacatovajëtatsinua Diosojavabelia nama-taenetsia panenasivanexa.

Pacuenia Judas toyaquina Dioso pejumecovënëtsivijavabelia pejumecovënëtsiyaniva penajumetsënëtsilivaisi petsipaebavanapaevitsi yabara pelivaisi *(2 Pedro 2.1-7)*

³ Tajamonae bitso patacaasivavi, jamatabëpacatoyaquinatsi picani matavëjëa paneyapëtaenexa Dioso papecacapanepaejavanexa panijane-conivecua. Jamatabëpatoyaquinatsinua picani paneyapëtaenexa paxanë ata Dioso patanecapanepaejavanexa. Itsiata bajaraxua yabara apo pacatoyaquinae tsanetsi mapabaxutotaje. Vënëlivaisitaniji paxamëjavata pepa-tsijava penajumetsënëtsilivaisi petsipaebaponaevi. Bajaraxuata jitsipajë patacatoyaquinaenexa panejumecovënëtsiyaniva bajarapamonae papeca-tsipaebilivaisi. Tsipaji bajarapamonae pexaniaajailivaisi, palivaisi vaxaitsi jumecovënëtatsi, bajarapalivaisivecua, saicayalivaisi pacatsipaebavana-pa. Nexata paxamë bajarapamonae ajumesaëya patsipaebare palivaisi vaxaitsi jumecovënëtavanapatsi. ⁴ Tsipaji bajarapamonae, penajumetsënëtsilivaisi papecatsipaebavanapaevi, paxamë tuatujëta najoneyabiaba

pacatsitanajamatabëcuene itajëtsinejeva. Bajarapamonae jamatabëcuene navëxaniabiaya jumai tsabiabi: “Dioso baja cajena nacaitaxutotsoniatane vajanacacapanepaenexa. Bajaraxuata pibisiacuene exanae atatsi, apo itsacuene,” jai tsabiabi bajarapamonae. Bajarapamonae apo jumecovënëtsi caenë Dioso vajanacaevetsicuene. Apo jumecovënëtsinua caenë Jesucristo vajatuxanenëcuene. Bajarapamonae apo exanae pacuenia Dioso jitsipa. Apo exanaenua pacuenia Jesucristo ata jitsipa. Bajarapamonae itsamatacabi Dioso penaneconitsiaexanaejavanexatsi pijaneconi yabara, Dioso tajëvelia pejumelivaisibaxutota vajunupaebatsi.

⁵Payapëtaneme rabaja mapacuneje. Bajayata vajatuxanenë Dioso pijajivi capanepa Egipto nacuavecua, Israel nacuayaberena. Nexata baja payapëtae atamë bajarapacuene, itsiata jitsipajë panenajamatabënapitsinexa icatsia bajarapacuene. Bajarapacuenia vajatuxanenë Dioso pijajivi capanepae ata, pecapanepaecujinae icatsia verebiaba bajarapamonaemiyajuvënëvi. Bajarapacuenia verebiaba tsipaji bajarapamonae apo jumecovënëtsi. ⁶Panajamatabënapirenuu pacuenia Dioso exana ángelevijavabelia ata. Angelevi Dioso tonacuenebavanapa athëbëtsia. Angeleviyajuvënëvi apo exanae pacuenia Dioso itorobatsi. Apo jinavana paenua itsajota picaní Dioso tocopata pejinavanapaenexa. Bajaraxuata Dioso ángeleviyajuvënëvi cëbiaya jinavanapaeyaexana itsanacuata, pitaquirinacuata. Bajarajota ángelevi copiaevetavanapaeyaexanatsi Dioso penaneconitsiaexanaejavanexatsi. Nexata pamatacabi Dioso daxitamatacabijavabelianexa naneconitsiaexanaena daxita pamona naneconita Dioso javabelia, bajarapamatacabi Dioso bajarapaángelevi ata naneconitsiaexanaena daxitamatacabijavabelianexa.

⁷Panajamatabënapirenuu Sodoma tomarami ata, Gomorra tomarami ata, pemuxuneneta penaetomaranëmi ata. Pamonaemi jinavanapa bajarapatomaranëta, bitso pibisiacuene exanabiaba. Bajarapamonaemi apo jumecovënëtsi Dioso. Apo jumecovënëtsinua ángelevi ata. Bajarapamonaemi pevitota bitso pibisiacuene exanabiaba pevëna pebijivijavabelia. Bajaraxuata Dioso verebiaba bajarapamonaemi. Bajarapacuenia Dioso verebiaba bajarapamonaemi, pamona cotocaevi jinavanapa mapamatacabitaje, peyapëtaenexa. Nexata bajarapamonae ata pibisiacuene pexanaeyaniva, apo pevereverecaeisotojavabelia Dioso penaneconitsiaexanaeyanivatsi.

⁸Bajarapacuenia bajayata Dioso naneconitsiaexana pamonaemi pibisiacuene exanavanapa. Bajarapacuenia Dioso naneconitsiaexanae ata pamonaemi bajayata pibisiacuene exanavanapa, itsiata pamona penajumetsënëtsilivaisi pacatsipaebavanapa, apo canaëjëtsi Dioso penaneconitsiaexanaejavanexatsi. Pamona penajumetsënëtsilivaisi pacatsipaebavanapa, pibisiacuene exanabiaba. Bajarapamonae pina majitsinaebota tane papibisiacuene bajarapamonae exanaejitsia. Bajaraxuata nexata bajarapamonae pibisiacuene exanabiaba pevitota. Apo jumecovënëtsi pacuenia

Dioso itorobatsi. Dioso pijaángelevi ata bajarapamonae pibisiacuenia baracuaicuajai tsabiabi. ⁹Angelñē Miguel, ángelevi penamatacaitorobinē. Angelñē Miguel bitso ayaijamatabēcuenenē ata, yayiatane dovathi. Pibisiacuenia apo baracuaicuajai. Apo bijataenua. Bajayata Moiséspijinē petēpanucaenē jamatabēpitatsi picani dovathi. Nexata ángelnē Miguel apo copatsi Moiséspijinē dovathi pepitsinexatsi. Nexata dovathibeje, ángelnē Miguelbeje, najumenotabeje Moiséspijinēmi yabara. Itsiata bajarajota ángelnē Miguel pibisiacuenia apo bijatae dovathi. Saya xaniavaetsia ángelnē Miguel jumaitsi dovathijavabelia: “Dioso raja cabijataena,” jai. ¹⁰Itsiata baitsi jane pamonaē penajumetsēñētsilivaisi pacatsipaebavanapa, xaniavaetsia ángelevi apo tae ata, apo yapētae atanua, pibisiacuenia baracuaicuajai tsabiabi. Nexata pacuenia unupijidujuai apo cujarubi atatsi, itsiata pijacuata yapētane pexanaejavanexa, bajara pijinia pacuenia bajarapamonae ata saya pijacuata yapētane mapanacuapijicuene pexanaenexa. Nexata exanavanapa pibisiacuenia pacuenia jamatabēexana. Nexata itsamatacabi Dioso verebiabiana bajarapamonae bajarapapibisiacuenia pexanaexae.

¹¹¡Bitso bejiobi tsane pamonaē penajumetsēñētsilivaisi pacatsipaebavanapa! Bajarapamonae Dioso naneconitsiaexanaena. Tspaji pacuenia bajayata Caínpijinē jamatabēcuenēitsi, bajarapamonae ata jamatabēcuenēitsi tsavanapae. Bajayata Caínpijinē pibisiacuenia exanaponapona pacuenia jamatabēexana. Pacuenia bajayata Balaampijinē ata jamatabēcuenēitsi, bajarajamatabēcuenēitsi tsavanapae pamonaē penajumetsēñētsilivaisi pacatsipaebavanapa. Bajayata Balaampijinē Dioso apo jumecovēñētsi pacuenia itorobatsi. Balaampijine palata pepitsinexa, jivi matacapona pibisiacuenia pexanaenexa. Pacuenia bajayata Corépijinē ata jamatabēcuenēitsi, bajara jamatabēcuenēitsi tsavanapae pamonaē penajumetsēñētsilivaisi pacatsipaebavanapa. Bajayata Corépijinē apo jumecovēñētsi pacuenia Moiséspijinē itorobatsi. Nexata Corépijinē beyaxuabatsi Dioso. Bajara pijinia pacuenia pamonaē penajumetsēñētsilivaisi pacatsipaebavanapa, pibisiacuenia pexanaexae, nexata Dioso verebiabiana bajarapamonae. ¹²Pamonaē penajumetsēñētsilivaisi pacatsipaebavanapa, payajavanacaetuatabiabame itsa panacaetuatabiabame panenabainexa. Paxamē panacaetuatabiabame namataenetsia panenasivaxae. Nexata bajarapamonae najoneyabiaba panenacaetuatsijavata. Bajarapamonae pibisiacuenia pexanabiabixae, bepiauxirajava paxamē tuatuajēta. Bajarapamonae aurajibia ayajava xaeyabiaba. Petocopatsinexa itsamonae ata penaxaenexa, apo najamatabēxainabiabi. Pacuenia pijaoveja pevetsivi xaniavaetsia baeveta pijaoveja, bajarapacuenia itajara pacaeveta. Itsiata apo pacaevetsi xaniavaetsia. Epamonaē saya naeveta. Bajarapamonae pexanaejava, itsacueniejavayonexa ata apo xanepanae. Yapētanetsi pacuenia itsi vaita. Vaita itarērēbo pitsapae ata, itsiata ema apo jopae. Jovibo saya caponatsi. Nexata itsamonae peubijavaxi totsaquenae atatsi, apo jamatabēcueneyavenonaetsi. Bajara saya jamatabēcuenēitsi tsavanapae pamonaē penajumetsēñētsilivaisi pacatsipaebavanapa. Tspaji

apo jamatabëcueneyavenonae itsajivi ata. Peubinae, ponae apo nacuaitabiabi penacuaitsimatacabita ata, bajaraponae apo xanepanae itsacueneyavayonexa ata. Bajara saya jamatabëcuenetsi tsavanapae pamonaе penajumetsënëtsilivaisi pacatsipaebavanapa. Tsipaji apo jamatabëcueneyavenonae itsajivi ata. Peubinae, ponae apo nacuaitabiabi penacuaitsimatacabita ata, bajaraponae peubinë yatabutopaya juta petajuitsinexa isotojavabelia. Bajara pijinia pacuenia Dioso naneconitsiaexanaena pamonaе penajumetsënëtsilivaisi pacatsipaebavanapa pibisiacuene pexanabiabixae. Nexata bajarapamonaе Dioso xuabianatsi infiernojavabelia. ¹³Pacuenia malataca caecovëta apo rucae, caponanua pia-xuirapërë pitapayabelia, bajara saya jamatabëcuenetsi tsavanapae pamonaе penajumetsënëtsilivaisi pacatsipaebavanapa. Caejamatabëcuene apo xainabiabi. Bajarapamonaе piauracuene pexanabiabixae, nexata bepiaxuirajava paxamë tuatujëta. Bajarapamonaе pejamatabëcueneta jamatabëcuenebijianabiaba itsamonaе Dioso pejumecovënëtsivi. Pacuenia athëbëvetsica tulupu othopaena pevereverecaenexa, bajara pijinia pacuenia bajarapamonaе ata vereverecaena. Diosovecua naxuabiana. Tsipaji copaba pejumecovënëtsijavami pexaniajailivaisi. Bajaraxuata Dioso bajarapamonaе naneconitsiaexanaenatsi. Nexata bajarapamonaе pitaquirinacuata jinavanapaena daxitamatacabijavabelianexa.

¹⁴Enocpijinë bajayata ponapona. Bajaraponëmi Adánpijinë pemomoxi-yajuvënë. Nexata Enocpijinë Dioso pejamatabëcueneta bajayata tajëvelia vajunupaeba, pamonaе aeconoxae mapamatacabitaje penajumetsënëtsilivaisi pacatsipaebavanapa. Enocpijinë baja cajena bajayata tajëvelia bajarapamonaе yabara jumaiti mapacueniaje: “Vajatuxanenë Cristo, pijajivi ángelevi, ayaibitsaëtoxaneto yajava, najetarucaena. ¹⁵Najetarucaena penaneconitsiaexanaenexa daxita pamonaе apo exanae Dioso pitorobicueniatsi. Najetarucaena penaneconitsiaexanaenexanua daxita pamonaе pibisiacuenia baracuaicuajiai Dioso,” jai baja cajena bajayata tajëvelia Enocpijinë. ¹⁶Pamonaе penajumetsënëtsilivaisi pacatsipaebavanapa, apo sivajamatabëcuenebarëya itsacueneyavayo ata. Nexata pibisiacuenia baracuaicuajiai tsabiabi daxita xua bajarapamonaе tocopiapataponatsi. Apo jumecovënëtsi pacuenia Dioso itorobatsi. Nexata bajarapamonaе exanavanapa pijacuata penatojitsipacuenia. Bajarapamonaе ayaijamatabëcuenevi nataeya navajunupaebabiaba xua exana. Itsamonaеjavabelia itsa cuaicuajiai, pexaniacuenia cuaicuajiai tsabiabi. Bajarapacuenia pexaniacuenia cuaicuajiai tsabiabi saya pebarëyataenexatsi, perajutsinexatsinua penamatavenonaеjavanë.

**Pacuenia Dioso pejumecovënëtsivi muxujiobatsi
pejumecovënëtsiyaniva penajumetsënëtsilivaisi
petsipaebavanapaevitsi yabara pelivaisi**

¹⁷Tajamonaе bitso patacaasivavi, panajamatabënapire pacuenia baja cajena tajëvelia pacatsipaeba apóstolevi, vajatuxanenë Jesucristo pijajivi. Apóstolevi baja cajena tajëvelia pacatsipaeba pepatsijavanexa penajumetsënëtsilivaisi papecatsipaebivinexa. ¹⁸Apóstolevi baja cajena tajëvelia

pacajumaitsi mapacueniaje: “Nacua pecopiarucaevajënaeyota, itsamonae capocaponaena pexaniajailivaisi, Dioso pejumelivaisi. Bajarapamonae exanavanapaena pibisiacuene, pacuenia pijacuata natojitsipa,” pacajai baja cajena tajëvelia apóstolevi. ¹⁹Pamonae penajumetsënëtsilivaisi paca-tsipaebavanapa, bajarapamonae papecatsipaebillivaisita, Dioso panejumecovënëtsivi pacanavecuantsanaeyaexanapona. Bajarapamonae saya najamatabëxaina ëmapanacuapijijamatabëcueneje. Nexata pibisiacuene exanavanapa pacuenia pijacuata natojitsipa. Bajarapamonae Espíritu Santo apo tsijamatabëecaetsi.

²⁰Tajamonae bitso patacaasivavi, asaëyata Dioso pajumecovënë-tavanapare. Pacuenia Espíritu Santo pacaitoroba, pavajëtabiabare Diosojavabelia. ²¹Paxamë bitso Dioso pacaasiva. Bajaraxuata pacuenia Dioso pacaitoroba, pajinavanapare pibisiacuene paneexanaeyaniva. Bajayajebi pacopatsinejevamë, pacopiaevetavanapare matababi apo peve-reverecaëjava papecarajutsinexa vajatuxanenë papecaitaxutotsoniataexae.

²²Itsamonae jumecovënëtsi ata pexaniajailivaisi, Dioso pejumelivaisi, itsiata jumeabapona. Bjarapitsivi payavenonare xaniavaetsia pejumecovënëtsinexa bajarapalivaisi. ²³Bajarapamonae isotojavabelia bepejopae-vinexa. Tspaji pibisiacuenejavabelia jamatabëjopa. Bajaraxuata payavenonare bajarapitsivi. Itsamonae pijinia bitso pibisiacuene exanavanapa. Bajarapapibisiacuene paitoyamëre. Bajarapamonae itsiata paitaxutobejio-biataema. Payavenonaponare bajarapapibisiacuene pecopatsinexa. Itsiata baitsi jane xania. Panayajivitaema. Pëtsa paxamë ata bajarapamonaeta pibisiacuene panaexaname.

**Pacuenia apóstolenë Judas itoroba daxita Dioso
pejumecovënëtsivi: “Dioso, bitso ayaijamatabëcuenenëmë,”
pejainexa Diosojavabelia yabara pelivaisi**

²⁴Dioso caëjëpatsi papecaevetsinexa pibisiacuene paneexanaeyaniva. Nexata pamatababi Dioso naneconitsiaexanaena daxita pijaneconi pexainaevi, paxamë ata pacanubenaeyaexanaena bajaraponë Dioso, penivenivenaecotia pexainanenë, pitabarata. Itsiata baitsi jane paxamë paneconijibimë tsane. Bitso pabarëyamë tsane. ²⁵Bajaraponë pepo caenë Dioso. Bajaraponë Dioso nacacapanepaena vajatuxanenë Jesucristo cruzata vajanacasivatëpaexae vajaneconi yabara. Bajaraxuata daxitajivi bejumaitsi Diosojavabelia: “Diosomë, bitso ayaijamatabëcuenenëmë,” bejai. Betsipaebaponanua itsamonaejavabelia Dioso bitso ayaijamatabëcuene pexainanenëcuene. Dioso cajena daxitanacua pevetsinë. Betsipaebaponanua itsamonaejavabelia Dioso pecaëjëpaejavatsi pevetsinexa daxitajivi. Bajarapacuenia Dioso jamatabëcueneitsi tsaponaponae mapanacuae pexanaevajënaeya, mapamatababi ataje, daxitamatabajibavabelianexa ata. Bajara itsi tsane.